

續資治通鑑

冊
天

續資治通鑑卷第九十八

賜進士及第兵部尚書兼都察院右都御窻兵部尚書兼都等處地方軍務兼理糧餉世襲二等輕車軍務兼理糧餉世

宋紀一百五十三

起昭陽赤奮若正月盡逢攝提格十二月凡二

光宗循道憲仁明功茂德溫文臣曰漢人與夏

皇帝

諱構徽宗第九子母曰顯仁皇后韋王本為質帝始乙巳生帝於大內赤光照室八月賜名除建武軍節度

使檢校太尉封蜀國公三年封廣平郡王宣和三年進封康王資性朗悟好學彊記日誦千餘言挽弓至一石五斗欽宗立改

元靖康人拆其字謂十二月立康王也金兵至汴京奉使軍前意氣閒暇宗翰謂非親王遂更請肅王為質帝始得還八月被

命再使軍前議和卒不赴留相州閏十二月欽宗詔帝為兵馬大元帥開府相州二年四月欽宗北遷張邦昌奉元祐皇后垂

簾聽政命帝嗣統帝次南京百官上表勸進乃許

建炎元年

金天會五年

五月庚寅朔兵馬大元帥康王即

皇帝位於南京築壇天治門左作冊告天撰文肆赦

適太常寺主簿張浚自京師至因以浚攝太常少卿

導引行事昧爽登壇受命冊曰嗣天子臣構敢昭告于昊天上帝金人內侵二帝北狩臣構以道君皇帝之子奉宸旨以總六師握兵馬元帥之權倡義旅以先諸將冀清京邑復兩宮而百辟卿士萬邦黎獻謂人思宋德天眷趙宗宜以神器屬于臣構辭之再四懼不克負荷萬口一辭咸曰不可稽皇天之寶命慄慄震惕敢不欽承讀畢帝南鄉慟哭久之卽位于應天府治之正廳簾陛如殿儀張邦昌率百官稱賀改元大赦天下命西京留守修奉祖宗陵寢罷青苗錢應死及歿于王事者並推恩奉使未還者祿其家一年選人在職非在職者並循資臣僚因亂去官者限一月還任潰兵羣盜咸許自新係欠官負不以名色皆免南京及大元帥府嘗駐軍一月以上者夏稅悉

蜀之應天府特奏名舉人並與同出身免解人與免
省試諸路特奏三舉以上及宗室嘗預貢者並推恩
州郡保守無虞者推賞應募兵勤王之人以所部付
州縣主兵官訖赴行在中外臣庶並許直言自今命
官犯罪更不取特旨裁斷布衣有材略者令禁從監
司郡守限十日各舉一員餘如累朝故事以黃潛善
爲中書侍郎汪伯彥同知樞密院事。是日元祐皇
后東京撤簾 辛卯尊靖康皇帝爲淵聖皇帝元祐
皇后爲元祐太后詔宣仁聖烈皇后有安社稷大功
姦臣懷私誣讎聖德可令國史院撫實刊修播告天
下 翁彥國知江寧府兼江南東西路經制使賜鈔
鹽錢十萬緡使修江寧城及繕治宮室以備巡幸
寶文閣直學士趙子崧請對略謂開邊之患驗在目

前今熙河五路進築州軍堡寨不係緊要控扼去處
並宜罷功明諭夏人示以德意諸郡守戍之兵分屯
陝西見在兵馬與河東北之兵合六萬人分爲三屯
一屯澶淵之閒一屯河中陝華之閒一屯青鄆之閒
平時訓練以備非常萬一敵騎南渡則並進深入以
擣燕山之虛焚舟渡河人自爲戰功未必不成也

壬辰詔尙書左僕射兼門下侍郎張邦昌爲太保奉
國軍節度使封同安郡王五日一赴都堂參決大事
以范訥爲京城留守劉光世爲省視陵寢使耿延禧
董耘高世則並提舉萬壽觀留行在延禧耘仍兼侍
讀趙子崧爲延康殿學士知鎮江府梁揚祖爲徽猷
閣待制知揚州隨軍應副黃潛厚試戶部侍郎范致
虛知京兆府充南道都總管河北轉運判官顧復本

爲北道副總管張深充龍圖閣直學士知熙州直徽
猷閣陝府西路計度轉運副使王庶陞直龍圖閣知
延安府 胡舜陟言今日措畫中原宜法藝祖命郭
進李漢超董遵誨等守邊之術以三京關陝析爲四
鎮拱滑潁昌隸東京鄭汝河陽隸西京恩濮開德隸
北京同華陝府隸京北擇人爲節帥使各以地產之
賦養兵自衛且援鄰鎮又京帑積錢千餘萬緡宜給
四鎮爲糴本若四帥得人庶幾中原不失江左可居
詔付三省未幾舜陟罷去議遂格 癸酉遙尊韋賢
妃爲宣和皇后舊制帝母稱皇太妃至是以道君皇
帝在行特上尊號 立嘉國夫人邢氏爲皇后 〔攷異〕
趙姓

之遺史上卽位欲立後宮潘氏爲皇后呂好問諫止乃以
爲賢妃案高宗念邢氏故久不立后恐遺史誤也今不取

門下

侍郎耿南仲罷爲觀文殿學士提舉杭州洞霄宮帝

薄南仲爲人因其告老故有是命

〔攷異〕耿延禧中興記張邦昌已復辟臣耿南

仲奏臣素拙遭遇皇帝竭盡愚直惟靖康行遣蔡氏其徒實難必不利臣父子乞大王保全上曰今日之事吾最痛心其次門下侍郎父子耳且老矣月以數百千養一前朝老師傳直易耳人言毀譽何足信因泣下南仲誤國天下共知豈因行遣蔡氏被排之故今不取

甲午資政殿大學士李綱爲尙書右僕射兼中書

侍郎趣赴闕先是黃潛善汪伯彥自謂有攀附功擬得相帝恐不厭人望乃外用綱二人不平因與綱忤

直龍圖閣權應天府朱勝非召試中書舍人延康殿學士何志同知應天府楊維忠爲建武軍節度使主管殿前司公事賞翊戴功也黃潛善汪伯彥議

罷民兵及降盜而揀其士馬之精銳者隸五軍是日以孔彥威爲東平府兵馬鈐轄劉浩爲大名府兵馬鈐轄丁順爲滄州兵馬鈐轄秉義郎王善爲雷澤尉浩所將皆民兵而順與彥威帥府所降諸盜也未幾

順善作亂于河北 乙未恭謝鴻慶宮帝大慟羣臣
皆哭先是太常卿劉觀在圍城中與汪藻謀夜以栗
木更刻祖宗諸后神主二十四而取九廟累朝寶冊
悉埋之太廟至是觀導駕因陳其事帝嘉歎久之

以五月二十一日爲天申節 尙書右丞馮澥罷爲
資政殿學士知潼川府李回知洪州呂好問守尙書
右丞好問持元祐太后手書來賀帝勞之曰宗廟獲
全皆卿之力遂有是命 王時雍提舉成都府玉局
觀言者論時雍留守東京金人取皇族遣之殆盡及
取其壻太學博士熊產詩則設計爲免自以身兼將
相請用二府羈蓋又竊禁中寶物以遺金使爲名有
何面目復居都堂遂有是命自是受僞命諸臣稍稍
引退矣 詔自今天文休咎並令太史局依經奏聞

如或隱蔽當從軍法 李綱至太平州聞帝登極上

時事略謂和不可信守未易圖而戰不可必勝又言

恭儉者人主之常德英哲者人主之全才繼體守文

之君恭儉足以優于天下至于興衰撥亂則非英哲

不足以當之惟英故用心剛足以斷大事而不爲小

故所搖惟哲故見善明足以任君子而不爲小人所

閒在昔人君惟漢之高光唐之太宗本朝之藝祖太

宗克體此道願陛下以爲法 金宗翰旣班師留諸

帥分守河東北地萬戶尼楚赫舊作銀尤可今改屯太原洛索

舊作婁室今改屯河中副都統素赫舊作詔合今改屯真定蒙克舊作蒙哥

今改進據磁相渤海萬戶大托卜嘉舊作撻不野今改圍河閒是

日命龍神衛四廂都指揮使馬忠沂州觀察使張煥

將所部合萬人自恩冀趨河閒以襲之 丙申呂好

問兼門下侍郎

觀文殿大學士提舉西京嵩山崇

福宮徐處仁爲大名尹北道都總管初南都之圍處仁在城中都人指爲姦細殺其長子直祕閣庾處仁感疾至是力疾入見而行簽書樞密院事曹輔卒時前執政皆免輔獨留始至南都首陳五事一日分屯要害以整兵伍二曰疆理新都以便公私三曰甄拔人才以待駕馭四曰經制盜賊恩威並行叛則討之服則舍之五曰裂近邊之地爲數節鎮以謹秋防帝嘉納未幾以病卒謚忠達丁酉黃潛善兼御營使同知樞密院事汪伯彥兼御營副使初制殿前侍衛馬步司三衙禁旅合十餘萬人高球得用軍政懈弛靖康末衛士僅三萬人及城破所存無幾至是殿前司以殿班指揮使左言權領而侍衛二司猶在東

京禁衛寡弱諸將楊惟忠王淵韓世忠以河北兵劉光世以陝西兵張俊苗傅等以帥府及降盜兵皆在行朝不相統一乃置御營司總齊軍政因所部爲五軍以王淵爲都統制韓世忠張俊苗傅等並爲統制官又命劉光世提舉使司一行事務潛善伯彥別置親兵各千人優其廩賜議者非之

（攷異）建炎置御營司史不載其本末中興小

紀略書其事乃係元年七月並命二相時又云除劉光世爲都統制並誤也潛善伯彥別置親兵今據馬伸疏

詔翟興

團結義兵保護祖宗陵寢遣統制官薛廣以三千

人出內黃張瓊以二千人出開德共復磁州邵溥

爲京城副留守王時雍責授安化軍節度副使黃

州安置以言者論時雍圍城中擅行三省事也吳玠

自陳國家禍變不能死節乞正典刑詔以龍圖閣學

士提舉江州太平觀莫儔自陳久留敵營備遭困辱

乞置散地詔以述古殿直學士提舉亳州明道宮

戊戌詔贈李若水觀文殿學士賜其家銀帛五百匹
兩官子孫五人以路允迪耿延禧爲京城撫諭使

王倫遷朝奉郎假刑部侍郎充大金通問使進士朱
弁爲修武郎副之又以傅雱假工部侍郎充通和使
武功大夫趙哲副之倫家貧無行以任俠往來京洛
閒京城破淵聖御宣德門都人喧呼倫乘勢徑造御
前曰臣能彈壓帝解所佩夏國寶劍賜之倫曰臣未
有官豈能服衆帝亟取片紙書王倫除兵部侍郎倫
與惡少數人傳旨撫定

（政異）揮塵錄靖康末李士美罷相就第倫直造拜帝于堂下自言願隨

相公一入禁中士美辭以退閱會有旨令前宰執赴殿庭議事不得已攜之入倫自陳殿下曰臣真宗故相王旦孫也有致君澤民之術宣和中上書言大遼不可滅女直不可盟果如臣言今圍城既急臣當募死士數萬願陛下待上皇挾諸王奪萬勝門決圍南幸欽宗忠之解所佩夏國寶劍以賜且以片紙批曰王倫事成日可除尚書兵部侍郎翼日言已得豪俠萬餘悉願効死時宰相何文績已主和議

兼以正道狂生恐滋它變請誅之賴孫仲益得闕出都正道倫字也
攷李邦彥以靖康元年二月罷相未幾出知鄧州尋持餘服方城圍
時未嘗召前宰議事明清蓋誤今據趙姓之遺史中興姓氏錄及倫
本傳又賜劍事它書無之攷王鉉有爲倫作御劍銘或有其事也

至是上書自伸前志乞使敵國問二聖起居旣而議
改雩爲祈請使閣門宣贊舍人馬識遠爲副而倫弁
哲不遣時潛善等復主議和因用靖康誓書畫河爲
界始敵求割蒲解圍城中許之潛善乃命刑部不得
謄赦文河東北兩路及河中府解州其乙未丁酉所
遣兵且令屯大河之南應機進止 己亥詔朕將謹
視舊章不以手筆廢朝令不以內侍典兵權容受直
言斥去浮靡非軍功無異賞非戎備無僦工若羣臣
狃以故習導諛諱過大臣蔽賢所主非實臺諫糾慝
有言非公凡此之屬必罰無赦 時諸道勤王兵皆
至行在陝西將官王德初隸劉光世爲右軍將官德

有威名號王夜叉 以胡蠡爲高麗國信使黃越副

之 李綱誅軍賊周德于江寧德旣作亂會經制司

屬官鮑貽遜統勤王兵七千至城下江淮發運判官

直徽猷閣方孟卿檄貽遜進兵逼城德乃受招而殺

掠如故知溧陽縣楊邦乂亦起民兵討之綱至太平

州遣使諭以勤王始受節制然猶桀驁欲乘閒逃去

綱次江寧與江南東路轉運判官權安撫司事李彌

遜謀大犒羣賊于轉運司執德與其徒聶旺磔于市

誅黨四十餘人而令提舉常平王枋統其餘兵旋改

鮑貽遜宣教郎楊邦乂就陞通判江寧府 庚子詔

靖康大臣主和誤國特進李邦彥責授建寧軍節度

副使安置潯州崇信軍節度副使涪州安置吳敏移

柳州祕書少監亳州居住蔡懋移英州責授正奉大

夫提舉南京鴻慶宮李昉惠州中大夫提舉亳州明
道宮宇文虛中韶州承議郎提舉亳州明道宮鄭望
之連州通直郎提舉杭州洞霄宮李鄴賀州竝安置
壬寅封後宮潘氏帝在康邸宣和皇后爲納之有
寵邢后北去妃以無名位得留至是封賢妃以梁師
成第賜其叔父永思

〔攷異〕李心傳曰趙姓之遺史靖康初軍
事才興宣和皇后使一小鬟背負被袂步

行出內欲歸章家過潘氏門永思妻號郡君適在門側請入避風露
宣和皇后遂造其家徐言是康王之母韋氏郡君謹奉之出潘氏侍
左右宣和皇后知潘氏笄而未嫁因求歸康邸上出使河北時潘氏
已妊復因無名位不在北行之數致靖康元年正月金數攻京城是
時道君雖夜出門城中未亂宣和皇后不應徒步出宮若城破道君
徒步入宮時上出使已久又妃非永思女其父永壽直翰林醫局紹
興十四年三月十一日贈太子
少師日歷有制詞姓之並誤

江淮發運使梁揚祖與工

部員外郎楊淵同提領措置東南茶鹽公事置司真
州時東北道梗鹽筴不通揚祖奏真州東南水陸要
衝宜遣官置司給賣鈔引所有茶鹽錢並充朝廷封

椿諸司毋得移用故有是命 以開封尹徐秉哲充
徽猷閣直學士提舉江州太平觀趙子崧言京城人
士籍籍謂王時雍徐秉哲吳玠莫儔范瓊胡思王紹
王及之顏博文余大均皆左右賣國逼太上皇取皇
太子污辱六宮公取嬪御捕繫宗室盜竊禁中財物
張邦昌未有反正之心十人皆日夕締謀冀以久假
至僭號時思獻赦文直用濮安懿王廟諱邦昌皇恐
博文則曰雖欲避堯之子其如畏天之威伏望將此
十人付獄鞠治明正典刑以爲萬世人臣之戒 是
日淵聖皇帝次代州度太和嶺至雲中留十餘日自
離都城舊臣無敢問起居者至代州惟滕茂實迎謁
于道茂實以靖康初出使時兄禰通判代州已先降
宗翰素重茂實茂實遷之代州又自京師取其弟華實同

居茂實聞淵聖將至卽自爲哀詞篆宋工部侍郎滕
茂實墓九字取奉使黃幡裏之授其友董銑翼日淵
聖及郊具冠幘號哭迎拜宗翰逼令易服茂實力拒
不從竝請侍舊主俱行不許

〔攷異〕汴都記少帝出城時茂實詣敵營上書遂留下或傳其

爲尼瑪哈內相與宋史不同今不取

癸卯詔以二聖未還罷天申節上

壽常禮自是至紹興十二年皆如之姚平仲再復

吉州團練使所在出榜召赴行在平仲劫寨不利傳

者以爲亂兵所殺靖康末復忠州刺史帝思其才命

所在訪之或云平仲隱九江山中乙巳詔諸路勤

王兵還營令所在人賜錢三千資政殿學士簽書

樞密院事張叔夜卒初叔夜北遷道中惟飲湯水至

白溝

〔攷異〕李心傳云叔夜從淵聖在尼瑪哈軍中自鄭州而御此尼瑪哈東軍不知何以至白溝今仍從東都事略書之

者曰過界河矣矍然而起仰天大呼翼日扼吭死年